





皇明風雅卷之七

七言古詩二十六首

懷龍門辭四首寄宋景濂

劉基

我思美人乃在仙華之山山前夜半掛河漢天津兩  
旗俯可攀我欲從之阻河關初平不來白羊死瘦骨  
蝕盡莓苔頑風沙蕭蕭隔人間玄霜日夕凋玉顏有  
鳥有鳥丁令威側身下上空孤飛女媧石墜鰲脚折  
海水散作雲霏霏山中有竒樹一華一干秋美人何  
不折寄我使我歎恨長凝眸深沉洞谷山鬼集陰氣  
六月冰霜留嗟哉美人誰與儔明年定約赤松子與



爾群峯頂上游

有美一人兮美且仁自我不見兮不知幾春仰玄穹  
兮睇參辰為合為離兮孰測其因青冥無階兮江海  
無津風雨茫茫兮蛟龍怒噴安得羽翼兮致我與隣  
有美一人兮美且都青霞為衣兮白雲為裾被秋蘭  
兮佩珣玕泰和與游兮中黃與居瞻望弗及兮芳歲  
其徂山高水深兮道阻且紆安得羽翼兮致我與俱  
有美一人兮在山中蒼眉黑鬚兮玉雪其容飲沆瀣  
兮滄紫虹澡石泉兮灑清風邀初平兮從赤松超逍  
遙兮樂無窮安得羽翼兮致我與同

為祝彥中題山水圖

高軒玲瓏不受暑半幅輕綃宿烟雨白間素壁生空  
明似聞水聲繞庭宇松髯拂天藤蔓垂枯根瘦石相  
因依寒溥不驚虎兕卧嵐翠欲與蛟虬飛空江悠悠  
一漁艇渚白沙明萬魚靜武陵桃花何處尋落日微  
風片帆影

送人分題得鶴山

丁令威乃在崑崙之墟閭風之巔羽衣誤作塵土夢  
回首人世三千年空山落日松栢冷苦霧慘慘含悲  
泉夢隨回飈訪瓊田紫鷄青鴨還相憐丁令威將奈



何野有矰繳際有罔羅前飛鳥鳶後駕鶴啄腥爭腐  
聲嘍囉渺予懷兮隔烟蘿杳冥冥兮倚長歌丁令威  
胡不歸槐江之山連大隗玉樓金嶂中天開玲瓏碧  
樹鏘瓊瑰鳳皇有閣鸞有君胡為兮獨蒿萊丁令  
威歸去來

畫竹歌為道士詹明德賦

我所思兮在瀟湘蒼梧九疑渺無際但見綠竹參天  
長上有寒烟凝不飛下有流水聲琅琅中有萬古不  
盡離別泪化作五色丹霞將水穿崖貫石出厚地風吹  
露滌宵有光我欲回之邀鳳凰天路脩阻川無梁孰

知畫史解人意能以造化歸毫芒虛堂無人白日靜  
使我顧盼增慨慷玄霜慘烈歲將晏鼯啼鼯叫天悲  
涼我所思兮杳茫茫山中紫筍春可茹歸來無使遙  
相望

夜聽張道士彈琴歌

白間含光月照席梅花入簷珠的皪藍宮道士彈七  
絃明星在樹霜滿天鏘如暗泉發幽竇悄若空山叫  
猿狖霧雨寒吹松柏響波濤怒激蛟龍鬪神奔鬼恠  
入杳冥鸞孤鶴寡風泠泠湘娥宵攀竹枝泣紫鳳曉  
啄梧桐鳴悽悽欲斷還復續啼鴛一聲啾草綠春然



皇明風雅卷七  
三  
清商行素秋落葉灑地蟲啾啾擁衾聽之消百慮  
逐行雲自來去九疑連天洞庭遠海闊烟深不知處  
蓋宮道士聽我語世無子期誰識女桑間濮上方施  
行白雪陽春棄如土

題陸放翁賣花叟詩後

君不見會稽山陰賣花叟賣花得錢即買酒東方出  
日照紫陌此叟已作醉鄉客破屋含星席作門濕螢  
生竈花滿園五更風顛雨聲惡不憂屋倒憂花落賣  
花叟但願四海無塵沙有人賣酒仍賣花

為丘彥良題牧谿和尚千鴈圖

往時惠崇畫鴈對之如在江湖游只今此圖又精  
妙中有千里瀟湘秋乃知浮屠性多巧意匠不與凡  
夫儔吳松江長具區闊天目虎丘青一髮西風九月  
杭稻黃朔鴈飛來翼相戛農夫苦飢鴈獨飽此意畫  
師應識察近者分明辨羽毛遠者縹緲瞻秋毫或乘  
飄風入烟霄或翳落日沉隍濠起如武侯布八陣集  
如萬舞回旌旄眠沙卧草鳴且翱喋呷藻荇亂蓬蒿  
禾空穗盡却歸去紫塞漠漠春雲高我家南山限蒼  
嶺鴈飛不到川路永深林大谷蛇豕盛愁向他鄉撫  
虛景人言鴻鴈比弟兄我有兄弟隔兩城題詩卷盡



謝客去無使感愴傷中情

秋夜月

秋夜月黃金波照人哭照人歌人歌人哭月長好月缺月圓人自老

龍灣城

孫炎

龍灣城壯如鐵城下是長江城頭有明月月色照人心不移江水長流無盡時

題好溪圖送憲使黃繼先

君乘馬望君來括蒼下君乘舟望君來好溪頭好溪水生玳瑁魚好溪水生明月珠好溪水生青珊瑚使

君來此月再樞惟飲此水無一需使君之清水不如臨別贈君青絲轡隨君馬頭行萬里相思之心有如

寶劍歌

寶劍光耿耿佩之可以當一龍只是陰山太古雪為誰結此青芙蓉明珠為寶錦為帶三尺枯蛟出水海自從虎革累干戈飛入芒碭育光彩青田劉郎漢諸孫傳家惟有此物存匣中千年睡不醒白帝血染桃花痕山童神全眼如日時見蜿蜒走虛室我逢龍精不敢彈正氣直貫青天寒還君持之獻明主若歲大



皇明原形卷七  
五  
旱為霖雨

題米元暉山水

張以寧

高堂曉起山水入古色慘淡神靈集望中冥冥雲氣  
深祗恐春衣坐來濕江風吹雨百花飛早晚持竿吾  
得歸身在江南圖畫裏令人却憶米元暉

題李白問月圖

誰提明月天上懸九州蕩蕩清無煙天東天西走不  
駐姮娥髮霜垂兩肩中有桂樹萬里長吳剛玉杵聲  
闐闐顧兔杵藥宵不眠天翁下視為爾憐頗聞昔時  
錦袍客乃是月中之謫仙帝命和予羽衣曲江橋一

斷心茫然竹王祠前霧如雨躑躅花開啼杜鵑月在  
天上缺復圓人間塵土多英賢舉杯問月月不言風  
吹海水秋無邊滄波盡捲金尊裏清影長隨舞袖前  
相期迢迢在雲漢嗚呼此意誰能傳騎鯨寒廓忽千  
年金薤青燐垂萬篇浮雲起滅焉足異終古明月懸  
青天

題進上下友會瘦馬圖

卜侯喜我詩袖出瘦馬圖前有杜陵瘦馬行令我閣  
筆久嗟吁憶昔馬齒未長日金羈蹀躞鳴天衢逐景  
虞泉日未晡羲和頓轡喘不蘇石根一蹶亦常事誰



遺逸足輕夷途霜風大澤百草枯飲斃不飽長毛踈  
相者舉肥汝苦瘠委棄乃在東城隅病顙有時磨古  
樹翻蹄無力袞平蕪當年笑殺紫燕愚中路清涕流  
鹽車嗟哉此馬世罕有駑駘多肉空敷腴骨格稜層  
神觀在頗類山澤之仙癯解劍贖汝歸伯樂今豈無  
浴之萬里流秣以百束芻首霜花白春雲鋪氣全或  
比新生駒持之西獻穆天子尚與八駿爭先驅瑤池  
雲氣浮太虛日出積雪青禽呼長望臨風心鬱紆

次韻同年李孟函編脩見貽

玉京仙家十二樓真珠垂箔珊瑚鈎錦袍仙人醉吟

處蟠桃開遍金鰲頭笑予卜居問詹尹江楓搖落霜  
鴻影淮水東邊昔遇君瓊花瀉露金盤冷美人雲髻  
歌堂堂白日緩轡迴清光五年相別復相見桂樹蕭  
颯飛秋霜君今青雲致身早笑語從容陪閣老垂鞭  
曉拂瓊林枝抽毫夜視明光草雪風吹酒生綠鱗我  
起洗濯新豐塵會當鳥爪擘麟脯海上一笑三千春

題張起原舟中看山圖

張侯往年官衡州州之名山無與傳蓉旌羽節降白  
日紫蓋石廩騰清秋侯也愛山得山趣似是昔時王  
子猷每憐馬上看草草不得獨往探竒幽茲辰歸來



好風色熨平翠殼鋪湘流中流容與沙棠舟舟中傲  
睨紫綺裘青山喜人不肯走一一自獻當船頭掀髯  
轉盼領其妙誰歟知者雙蜚鷗明霞返照儼不動白  
雲翠烟相與浮獨不見巴船挨拖水如箭盤渦轂轉  
令人愁好山縱有豈暇賞急電一瞬過雙眸古來會  
心亦良少千年幾見斜川遊絕憐詩句餘秀色我起  
高咏心悠悠朱郎落筆宛飛動毋乃親見此景不嗟  
侯之意我亦有艇子况繫溪南洲秋山石上芝草長  
我獨胡為此淹留

七夕吟全張士行賦

銀河迢迢向東注玉女盈盈隔秋渚金梭飛飛擲煙  
霧織作青鸞寄幽素青鸞織成不飛去仙郎脉脉愁  
無語無語相望朝復暮白榆搖落成秋樹藕花香冷  
鴛鴦浦天上銀橋寶車度風清蕊殿開瑤戶雲屏霧  
褥芙蓉吐經年香夢遙相許一夕離腸為郎訴弄姬  
妬人留不住天鷄角角扶桑曙龍巾荏苒啼紅露亂  
點雲開逗飛雨伯勞西飛燕東翥河乾石爛愁終古  
翠樓乞巧娉婷女鏡裏青螺掃眉嫵博山沉煙裊雙  
縷不識人間別離苦

倦繡篇為雲中呂遵義作



蘇蕙葉暗江雲暖翡翠單飛怨春晚陳女多情玉鏡  
分陸郎薄倖斑駁遠寶鴨團爐百和香錦鴛方褥五  
文章陰陰垂柳籠書幌點點飛花落繡床雙鸞欲寄  
金閨倩燕月吳雲不相見柔腸萬轉逐迴文亂緒千  
條縈弱線女貞枝上燕雙棲夜合花前思欲迷停針  
嘿嘿無人會但覺春山兩葉低曉嘶綉勒門前路夜  
炙銀燈帳中語指點香茸舊唾痕見妾朝朝斷腸處

洗衣曲同唐括子寬賦

洗衣女郎足如雪寒波曉浸鴉頭襪笑移纖筍整綉  
裙素腕微鳴玉條脫羅衣淚粉痕斑斑欲洗未洗沉

吟間波寒恐洗郎思去不洗復恐傍人看紅顏娟娟  
照清泚祗惜芳年駛如水西風夢冷鴛鴦起露滴紅  
香藕花死洗衣洗衣復洗衣小姑嗔妾歸去遲小姑  
十二方嬌癡此恨他年汝自知

洗衣辭再同仲寬賦

妾身內郡良家女雙鬟嫁作東隣婦寒機霜夜織流  
黃翰與官中了門戶嫁時春衣裁白苧是妾手中織  
成布相從箕帚不暫離雖有新衣不如故憶魯女傳  
授妾詩被服澣濯古后妃妾家貧素無侍兒携衣洗  
洗衣不辭妾人不是西家施浣紗石上揚蛾眉妾人



不比溧陽女殺身急義中道虧河之水清且漪中有  
鯉魚紅尾肥堂上老姑日午飢洗衣洗衣須早歸河  
上風塵緇妾衣

李秀才琴所卷

圭齋先生吾座主揚州拜之今五年京師見贈李君  
字我未識面知君賢君家具區滉漭邊流水倒入冰  
絲絃山空露下鶴孤響林深入稀蘭獨妍憶昔我從  
成連仙夜鼓一曲蓬萊巔衆真拊掌六鰲舞碧海白  
月懸青天論心相許太古上握手一笑清尊前圭齋  
今者歐陽子將琴未老先歸田何時青山拂白石聽

馬松澗鳴秋泉曲終細說玉堂事與作人間圖畫傳

醉樵歌

張仲簡

東吳市中逢醉樵鐵冠欹髮飄蕭兩肩屹屹何所  
負青松一枝懸酒瓢自言華蓋峰頭住足跡踏遍人  
間路學書學劍總不成惟有飲酒得真趣管樂本是  
王霸才松喬自有烟霞具手持崑岡白玉斧曾向月  
裏斫桂樹月裡仙人不我嗔特令下飲洞庭春興來  
一吸海水盡却把珊瑚樵作薪醒時邂逅逢玉質石  
上看碁黃鵠立斧柯爛盡不成仙不如一醉三千日  
于今老去名空在處處題詩償酒債淋漓醉墨落人



問夜夜風雷起光恠

歌風臺

張光弼

世間快意寧有此亭長還鄉作天子沛宮不樂復何  
為諸母父兄知舊事酒酣起舞和兒歌眼中盡是漢  
山河韓彭誅夷黥布戮且喜壯士今無多縱酒極懽  
留十日感慨傷懷涕沾臆萬乘旌旗不自尊魂魄猶  
為故鄉惜從來樂極易生哀泗水東流不再回萬歲  
千秋誰不念古之帝王安在哉莓苔石刻今如許幾  
度秋風灞陵雨漢家社稷四百年荒臺猶是開基處  
皇明風雅卷之七

皇明風雅卷之八

七言古詩二十五首

將進酒

高啓

君不見陳孟公一生愛酒稱豪雄君不見揚子雲三  
世執戟徒攻文得失于今兩何有勸君相逢且相壽  
試看六印盡垂腰何侶一卮長在手莫惜黃金醉青  
春幾人不飲身亦貧酒中有趣世不識但好富貴忘  
其真便須吐車茵莫畏丞相嗔桃花滿溪口笑殺醒  
遊人絲繩玉缸釀初熟搖蕩春光若波綠前無御史  
可盡懽倒着錦袍舞鸚鵡愛妾已去曲池平此時欲



飲焉能傾地下應無酒壚處何苦寂寞孤平生一杯  
一曲我歌君續明月自來不須秉燭五岳既遠三山  
亦空欲求神仙在酒杯中

羈旅行

馬頭北風吹地白手冷時驚墮鞭策隻堠欲來雙堠  
過客程不盡關山多狐狸縱橫古城壞旗折官亭無  
酒賣土風淩處殊故園鄉音只聞僮僕言天涯歲晚  
無相識囊金已空歸不得暝投人家自炊黍土屋青  
燈鴈啼雨此時暫解羈旅愁夢與家人夜深語人生  
出門即苦辛何況長為萬里身遠遊總得功名好不

如貧賤鄉中老

車遥遥

鷓鴣啼霜海城白征夫促裝牛上輓天生兩轂轉長  
途那得令君不為客出門已遠第一程耳中鳴鐸漸  
無聲房戶寧嗟寂寞守山川唯念苦辛行欲車不行  
願車覆還愁損我車中玉安得身如芳草多相隨千  
里車前綠

憶遠曲

揚子津頭風色起卽船一開三百里江橋水柵多酒  
壚女兒解歌山鷓鴣武昌西上巴陵道聞卽處處經



過好櫻桃熟時郎不歸客中誰為縫春衣陌頭空問  
琵琶卜欲歸不歸在郎足郎心重利輕風波在家日  
少行路多妾今能使烏頭白不能使郎休作客

王昭君

都門塵拂春風面臨別看花淚如霰君王惆悵惜蛾  
眉不似前時畫中見白髮呼韓感漢恩寧胡謾號關  
支尊擅裘肉食本異俗不如但嫁巫山村黃沙白雪  
無城闕手冷鷓鴣絃夜彈歌相隨萬里到穹廬只有長  
門舊時月妾語還憑歸使傳妾身沒虜不須憐願君  
莫殺毛延壽留畫商岩夢裏賢

姑蘇臺

金椎夜築西山土催作高臺貯歌舞文身澤國搆玉  
基却笑先人獨何苦銅鋪玉檻盛繁華幻作峰頭一  
片霞望處直窮三百里役時應廢幾千家蟠空曲路  
迷仙仗攀盡瑤梯纔到上外繞雕龍宛轉欄中施繡  
鳳歲雜帳熏爐長蕤鬪金香共道千齡樂未央茂苑  
月來秋佩冷洞庭雨過夏綃涼當窓衆妓如仙女揚  
袂迎風欲輕舉人從天上見經過烏向雲間驚笑語  
日暮橫塘花盡開卷簾臺上望玉來宴舟初自觀魚  
返獵騎還從射鹿回從登不用持鉞隊自列紅妝侍



高會香傳羅帕進黃柑縷切鷺刀供玉鱠燭光遠落  
太湖波驚起魚龍出沒多城上烏啼河漢轉此時誰  
問夜如何管絃嘈嘈聒人耳不聞兵未渡溪水欲携  
西子走登舟醉倚畫筵嬌不起瞑目無因到甬東可  
憐一炬綺羅空獻楮竟隨讐人計賜劔應辜諫士忠  
客來試問遺宮路物色荒涼總非故寨衣始信不虛  
言滿地荆榛見零露當年爭奪苦勞機却把江山付  
落暉聞說越王臺殿上如今亦有鷓鴣飛

夜飲丁氏侃宅聽琵琶

江月未出明星懸主人飲客夜不眠坐呼伶兒撥四

絃龍頭高撫玉軫圓轉關未奏濩索先勞唾唱切斷  
復連澁如清礪溜凍泉細若碧樹吟秋蟬忽然繁急  
何轟闐風沙滿把撒四遙厖行驚起飛不聯浮雲落  
葉俱綿綿一聲抹斷萬里烟夢入紫塞愁胡天問渠  
怨恨有幾千口不能說指為傳令人悵望思往年梁  
園楚榭長周旋帷中曲宴羅綺鮮夜遣飛騎迎嬋娟  
此絮出拜絳燭前文絲香條搭左肩曲項紫鳳抱丰  
偏楓香一調妙入玄好手正可羞紅蓮座間豪客皆  
詞仙舉杯邀我賦短篇贈之醉寫蜀錦箋可當十萬  
纏頭錢如今遠客江海邊欲聞絲音久無緣故人已



散陵谷遷生死流落俱堪憐今宵聽此真偶然顧影  
憔悴非昔妍長河欲曙落遠川暫當懽娛反憂煎向  
隅無言涕泪漣此身如在潯陽船

錢武肅王鏐券歌

妖兒初下含元殿天子仍居少陽院諸藩從此擁連  
城朝貢皆停事攻戰岐王已去梁王來長安宮闕生  
蒿乘天目山前異人出金戈雙舉風烟開羅平惡鳥  
啼初起犀弩三千射潮水歸來父老拜旌旗釀酒旌  
牛宴鄉里擊毬走馬騎春風錦袍玉帶真英雄詔書  
特賜誓終始黃金鏐字旌殊功虎符龍節彤弓矢後

祠猶令赦三死盡言恩寵冠當時天府丹書未喻此  
摩挲舊物四百年古色滿面凝蒼烟天祐宰相署名  
在尋文再讀心茫然古來保族須忠節受此幾人還  
覆滅王家勛業至今傳不在區區一方鏐人生富貴  
知幾時泰山作礪徒相期行人曾過表忠觀風雨斷  
蘇留殘碑

謁張中丞廟

延秋門上烏啼霜羯奴曉登天子林江頭老臣淚暗  
滴萬乘西去關山長公卿相率作降虜草間拜泣如  
群羊當時不識顏平原豈復知有張睢陽孤城落日



百戰後瘦馬倉尾人累瘡男兒竟為忠義死碧血滿  
地嗟誰藏賀蘭不斬上方劍英雄有恨何時忘千年  
海上見祠廟古苔叢木秋風荒摩挲畫壁塵網裏勇  
氣燁燁虬鬚張巫歌大招客酌酒忠魂或能來故鄉

趙希遠畫宋杭京萬松金闕圖

長松掀髯若群龍下遶宮闕雲千重鳳凰山頭望前  
殿翠濤正涌金芙蓉海門日出潮初上白鶴飛來近  
仙掌百官候綴紫宸斑露滴朝衣氣森爽漢宮楊柳  
唐宮花容易零落空繁華何如可獻至尊壽茯苓美  
似安期瓜鑿輿因戀湖山好樓閣清陰勝蓬島不知

風雨汴陵前虜卒新熱幾株倒當時榻前初進圖黃  
金趣賜聞傳呼何年流落在人世父老猶看思舊都  
客行近過吳山下落葉空林惟敗瓦豈無畫史似前  
人秋色淒涼不堪寫

壬子清明看花有感

楊基

熙寧五年壬子清明眉山蘇公看花于錢  
塘吉祥寺金盤綠藍獻花者五十二人有  
詩曰吉祥寺裏錦千堆前年賞花真盛哉  
道人勸我清明來腰鼓百面如春雷打徹  
涼州花始開是其事也洪武五年基與員



外方君看花於西江省掖節值清明歲亦  
士子去蘇公三百年矣歎公之不可見而  
猶得誦公之詩也因賦長句以記歲月庶  
為後三百年張本云

吉祥寺裏千堆錦綠髮仙人對花飲腰鼓金盤五色  
藍醉歸猶帶花枝寢東風壬子幾清明三百年来寺  
已傾沙河塘上痴兒女猶誦錢塘太守名看花我亦  
逢壬子况是清明非偶耳莫論南浦與西湖楚水吳  
山正相似青蓮居士識前因金粟如來見後身總不  
能知塵外劫也須曾是會中人

雪中登黃鶴樓

黃鶴樓前水平岸春雪當空舞撩亂東風知我欲登  
樓助以瓊瑤作奇觀昔入黃鶴去不回我騎白鳳橫  
江來遙看歷歷漢陽樹一色盡是梨花開人間何處  
最佳絕百尺闌干滿江雪氣壓滕王閣下雲與高庾  
亮樓中月瀛洲咫尺非難到鶴背瑋花落烏帽載酒  
誰能問謫仙題詩未必無崔顥江山得此清無敵頃  
刻銀蟾蕩瑤碧更着仙人紫綺裘卧聽呂岩吹鐵笛

雪中再登黃鶴樓

平生不願萬戶侯亦不願識韓荆州但願武昌連日



雪日日醉登黃鶴樓樓前絕景冠今古况有續紛雪  
花舞玉樹參差認漢陽銀洲浩蕩迷鸚鵡江頭兒女  
走欲顛謂我自是騎鶴仙白雲飛盡黃鶴去此景不  
見三千年我拍闌干為招手世上神仙果何有桃李  
非無頃刻花江湖亦是逡巡酒他日重來五百春樓  
前花草一番新相逢不識純陽子何用重尋回道人

鐵笛歌為鐵崖先生賦

鐵崖道人吹鐵笛宮徵含嚳太古音一聲吹破混沌  
竅一聲吹破天地心一聲吹開虎豹闥彤庭跪獻丹  
宸箴問君何以得此曲妙諧律呂可以召陽而呼陰

都將春秋一百四十二年筆削手譜成透天之竅價  
重雙南金掉頭玉箸不肯入直入弁峯絕頂俯瞰東  
溟深玉綱正統著高論唾彼傳癖兼書淫時人不識  
我不厭會有使者徵球琳具區下浸三萬六千頃之  
白銀浪洞庭上立七十二朶之青瑤岑莫邪老鐵作  
龍吼丹山鳳舞江蛟吟鼎裁宗彥吾所欽赤泉之盟  
猶可尋更吹一聲振我清白祖大鳴盛世載賡阜財  
解愠南風琴

白頭母吟

白頭母烏頭婦婦姑啼寒抱雙股婦哭征夫母哭兒



悲風吹折庭前樹家家有屋屯軍伍家家有兒遭殺  
虜越女能嘲楚女詞吳人半作淮人語東營放火夜  
斫門白日橫尸向官路母言我儂年少時夫妻種花  
花繞蹊夫亡子去寸心折花竇花窠成瓦罅十年不  
喫江州茶八年不歸姊妹家蘭茅菊本已凍死惟有  
春風薺菜花只憐新婦生苦晚不見當時富及奢珠  
簾臺榭桃花塢笙歌院落王家府如今芳草野烏啼  
鬼火燐燐日未西儂如葉上霜死即在奄忽新婦固  
如花春來瘦成骨婦聽姑言淚如雨妾身已抱橋邊  
柱絢使征夫戍不歸芳心誓不隨波去

玉仙謠和阮孝思作

二女仙圖從人持旄前引一仙騎白乳鹿  
一騎青騾又婢持翬扇在後畫妙入神霄

溪錢翁筆

赤岸無波海塵起蟠桃枝上花成子玉仙邂逅赴瑤  
池雲角凌空月如水子子千旌引素霓神廳步蹙青  
騾嘶珮環流響入碧落霧鬢約掠風鬟低鸞尾金寒  
歌扇影銖衣濕露香痕冷銀漢斜回星彩沉漸漸扶  
桑耀初景齊州九點春微茫六龍騰駕催晨光踏歌  
不到碧雲夢胡蝶牽愁秋心正長絲霞一滅瑤臺路想



像徒憐舜英慕青鳥千霜去不還猶許留情向毫素

詠七姊妹花

紅羅鬪結同心小七蓋參差弄春曉盡是東風兒女  
魂蛾眉一樣青螺掃三姊娉婷四妹嬌綠窓虛度可  
憐宵八姨秦國休相妬腸斷江東大小喬

七爨圖

牡爨躄扎爨坐二子就乳三子卧茆簷北風吹壁破  
群爨飢號愁雪墮君不見東家韓盧逞捷足朝逐狡  
兔夜食肉

休採花詞

休采花采花胡蝶飛休撲蝶撲蝶傷花枝花枝娟娟  
戲雙蝶臨風對花不忍折平生愛蝶仍愛花只恐傷  
花復驚蝶君似蝶妾似花花開能幾日胡蝶過西家

挂劍臺和黃子邕

生諾諾尚淺死諾諾更深當時季子意卽是徐君心  
嗟嗟徐君骨已朽寶劍摩挲在吾手正擬臨岐解贈  
君不意挂君墳上柳挂劍果何益聊以明不欺當時  
讓國心肯使徐君疑於乎劍可折臺可隳死生之諾  
不可虧

余將軍篆書搨本歌

張羽



余將軍守舒州舒州之城大如礪長江西來繞城流  
賊船如雲壓城破將軍提劍城頭坐劍未動虜已奔  
鯨鯢蔽江江為渾孤軍六年二百戰王師不來城自  
存無兵猶足戰無倉安可支豈無愛妾與愛馬殺之  
不解壯士飢力盡矢竭將奚為倉皇辭舌罵不已義  
士千人同日死抵今還有盡忠池碧血清冷化為水  
將軍持節東州時作此篆書形崛竒妙墨已隨神物  
化好事當時臨得之雖非其真意獨在垂金屈玉蟠  
蛟螭我拜重是忠臣跡秦相雖古其人非嗚呼將軍  
此書配者誰請君摹取浯溪石上中興碑

### 醉樵歌

華蓋山高亘南楚賸產竒材少榛莽山人嗜酒而業  
樵肯負清樽手持斧丁丁伐木雲之深束薪欲擔力  
不任且傾醺醖藉盤石痛飲莫知西日沉白眼望天  
歌鼓腹榭衣半染苔花綠頽然俯枕樹根瞑鼻息如  
雷撼巖谷起來却笑朱買臣底用金紫纏其身堪羨  
劉伶行荷鍾生死無累全天真榎楠豫畜等枯梗惟  
取醅醕真樂境泛觀世士多沉酣誤入牢籠猶未醒

### 錢舜舉溪岸圖

憶昔至元全盛日天子詔下徵遺逸吳興八俊皆竒



才秀邱王孫稱第一一朝玉馬去朝周諸子聲名總  
輝赫豈知錢郎節獨苦老作畫師頭雪白江南沒骨  
傳者希錢也得法誇精竒晴窗點染弄顏色得錢沽  
酒不復疑今人祇知重花鳥豈識此圖奪天巧玄雲  
抱石雷雨垂蒼山夾水龍蛇繞岸側溪迴共杳冥蒲  
稗深沉映魚鳥漁舟乍隨遠烟散客子競渡澄江曉  
自云布置師北苑只恐庸工未深了卷餘更有魏公  
題字擬鍾王差未老鄼侯得之恐神授使我一見喜  
絕倒雙溪流水清何極城外南山空黛色文章翰墨  
何代無二字傳能躡其迹為君題詩三歎息於乎古

人難再得

胡廷暉畫

畫師我識吳興胡身長八尺蒼髯頽目光至老烟不  
枯藻繪萬象窮錙銖大兒十歲能操觚小兒五歲能  
含朱得錢但供酒家需時復縱博為歡娛魏公家藏  
摘瓜圖妙筆奚翅千明珠胡一見之神頓蘇以指畫  
所潛臨摹落筆便與前人俱祝融撐空閣道孤朝雲  
暮雨相縈紆中天碧瓦仙人廬下有桃源風景殊鷄  
犬似是先秦餘潯陽野客山澤臞自從喪亂遭窮途  
幸逢治世容微軀堯舜亦有巢由徒已辨小艇長鬚



奴便欲往從漁父漁江湖此境何地無

別離曲

徐賁

山風吹霜榆葉老城鴉傳聲天欲曉征徒出門駕行  
裝斗杓倒懸月無光我停露車客停馬荒烟蕭蕭暗  
平野一盃濁酒且須釀九月垂楊不堪把歌聲感激  
絃聲繁坐上醉人爭咲喧相逢相別皆草草心事如  
絲向誰道

皇明風雅卷之八

皇明風雅卷之九

七言古詩一十四首

讀范太史傳

劉崧

麒麟鳳凰不世出我思美人寧有終飄然一去不可  
挽徒令四海歌清風慷慨范夫子行高身益窮讀書  
白雲下養母青山中大布之衣烏角巾於世不忤亦  
不同時來清江弄明月瀟灑絕似商山翁乘時徒步  
謁京國一鶚矯矯飛南東羣龍方滿朝惟爾獨來晚  
豈無五色線可補舜華衮當時作者楊與虞倡和往  
往諧笙竽藍田共擬電色玉滄海獨遺明月珠一朝



低迴去臺閣騎馬南入閩中暮幕中三仕總知名江  
海高風動寥廓蹇予束髮弄筆時已解竊寫中朝詩  
獨憐生晚墮荒僻每誦制作增漣沍峨峨百丈遺靈  
阜安得披榛薦卮豆茲晨再讀海康稟玉立踈髯恍  
神觀嗟哉老成今不存箏笛滿耳愁喧喧百年氣運  
有屯復月落江南空斷壘

觀鄧侍郎石磬歌

侍郎諱光薦字中甫廬陵人宋季以禮部  
侍郎從衛王海上事亟率妻子投海為大  
軍鉤致不死張元帥弘範異之待以賓禮

嘗過淮河漁父家見盆盎上置曲石命滌  
視之有銘文焉則磬也漁父云得之淮水  
中公以粟易之愛其文理精緻聲極清越  
寶藏之將百年矣丁亥春爾過公故宅其  
孫謙出以示余為之泫然以悲因賦七言  
歌一首紀其事

水中古磬世莫識扣之能鳴人始驚前朝文物寂博  
雅廬陵侍郎先得名淮河東游色惆悵忍使至寶成  
凋喪蒼茫何代沒泥沙憔悴當時雜盆盎歸來設屣  
當特懸扣擊往往遺音傳奇文漫滅科斗跡雨氣纏



結蛟龍涎是時周廟朝殷呶師襄南逾歎脩阻海門  
風起商聲哀萬里孤臣淚如雨鳳鳥一去不可聞宜  
尔孫子多才文高堂出此坐嘆息瞋色猶帶岷山雲  
便令敬之慎勿褻此物宜與天球列百年隱顯自有  
時蘊德含和竟誰泄嗚呼賢哲今不存對之使我傷  
心魂虐廷可登獸可舞此石不毀應能言

歎息行贈別胡思齊

歎息復歎息志士恒苦辛少日不得意暮年媿其身  
前有尊酒清且旨酌酒奉君君莫止人生最樂在相  
知莫徇虛名輕跣弛沛中屠販還封侯楊雄草玄空

白頭浮雲不盡萬里意白日長懸千古愁南山之陰  
多洞府十年不歸歎脩阻綠蘿芳草澹風煙君獨胡  
為在塵土五雲館前花滿津紫駟蹀躞驕青春春時  
禽鳥各自適燕子低迴還附人江風蕭蕭吹水急江  
寺鐘殘野鳥集口中吟咏眼看山細雨蒼茫愁獨立  
鄧溪漉漉秋水泥見爾令我懽相携酒酣燕坐石盤  
嶺明月正在松林西近聞煙塵起闡廣官軍驅馳日  
南上郡邑無人豺虎行道路蕭條竟安往我思舊日遊  
湖水東昔者登臨人不同常年九月章浦淨吳霜夜  
落青芙蓉芙蓉花開日欲暮美人娟娟隔煙霧一段



皇明風雅卷九  
三  
愁心化綵雲至今飛繞河橋樹今夕果何夕別君還  
憶君古來賢達常坎坷慎爾出處超其羣

寄贈曾文祥

十年不見故人面秋風吹雲隔山縣當時相遇湫江  
亭感子哀吟泪如霰山川莽莽生風塵道路東西長  
苦辛鬢毛蕭索易成老肝膽輪囷空向人金精洞前  
偶登訪一讀新詩一惆悵短童孤韻破岑寂長句雄  
辭入悲壯杜陵布衣日煩憂閭閻小兒狐白裘文章  
有神足付託富貴無分吾何求平原信陵骨已朽折  
節好賢竟誰有蒼苔苔茅屋雙短屐落葉離亭一樽酒  
丈夫意氣未可摧臨汝田園須早回成名豈必在朝  
市自古雲林多異才

秋夜詞

林烏夜啼金井西蟋蟀在戶聲相齊中天無雲白露  
下漸見梧桐青葉低幽居此時愁獨曉蘭燈雙照蛾  
眉小歌聲恐逐迴風高掩抑冰絃破清悄絃中語語  
心自傷低頭却看明月光羅衣一夜惜顏色庭草明  
日霑秋霜甘心霜下草祇在階庭好不作白楊花飛  
飛洛陽道

劍石歌

張箒壽



干將飛空化為石石耶劍耶誰復識陽文蘊秀墨色  
古陰縵積潤苔花碧卻疑女媧補天時手斷鰲足為  
立極風霜剝蝕綠龜鱗鬼神撫護蒼龍脊東吳南越  
事已矣何物君家乃有此好奇笑殺白猿公有道終  
歸赤帝子日出遙瞻殺氣凝雨洗似聞妖血腥煅煉  
不資爐鞴力胚胎自是陰陽精鳳山見之三太息至  
寶恐為豪者得翩然作歌頌其德神物揮霍生顏色  
我能為爾礪鋒鏑發爾幽潛使昭赫出掃妖邪扶正  
直莫令良善相戕賊慎勿止此空庭側

送王彥貞余伯熊張益坐三君子之京

二月鳧磯動春水一夜新雷群蟄起洗入甘雨自西  
來萬里江山圖畫裏王郎見之雙眼明仗劍便欲金  
陵行舌底瀾翻河漢瀉筆端歛吸風雲生余君年少  
青雲客心與王郎為莫逆空囊俯視無一錢胸中獨  
有天人策兩人相邀張隱君隱君老氣充輪囷坐聽  
鷄鳴不待旦即向鳧磯同問津問津直上金陵去石  
頭城高如虎踞烟花紫禁奏雲門日月龍旗拂珠樹  
榻前左右皆夔龍萬國此時來會同天閑得此渥注  
種凡馬不敢嘶長風我欲相從愧無用飛夢秦淮遠  
相送有待諸公致太平山林試撰河清頌



題松石圖

劉三吾

商公山水近代無曾為眉山春曉圖中涵一段大行  
氣識此者誰唯其徒括蒼陳公最後出腕指所到秋  
糝糊雲根拔地碧苔蘚海蛟噴雨蒼髯鬚九京可作  
兩翁起知是張璪是德符張君得之衡岳麓使我一  
見思故都恍然坐我風雲下秋聲萬壑來笙竽便當  
同出桂林去與子結屋雙樹隅子在東頭我西屋日  
誦匪風以自娛功名萬事勿問我我已希夷希夷吾  
贈卜者

劉永之

傳說騎箕去千載復落人間吁可愕偶爾逢之白日  
莫古木葉脫栖鳥泊振衣輯杖揖主人夜雨篝燈坐  
高閣執策縱橫布方几龍馬出河龜出洛口如懸泉  
日流電意氣軒昂出寥廓霜鐘微扣聲震野雄劍光  
芒露鋒鏑昔者北遊天子都南走沅湘望衡嶽諸公  
車迎盡虛左亦有封章薦鵬鷄一官蹉跎嶺海間萬  
事驚波已蕭索賈生常從季主卜楊雄昔受君平學  
賢者避世皆如此寧免俗士嗤輕薄我本清江持釣  
者舊有茅齋小東郭十年漂梗窟窟空谷豈有夢寐思  
高爵麋鹿之性不可馴矧肯低頭受羈縛君言富貴  
晚相逼使縱有之非所樂蓬萊方壺隔滄海琪樹三



花紛間錯綠髮仙翁久相待煩君為借遼東鶴

讀宋太史潛溪集

夏煜

混沌初刊太素斲挺生神人斷鰲膊剖乾割坤奠海  
嶽厥俗鴻荒人未覺帝命圖書出河洛奇耦生畫參  
伍錯煥乎斯文此其璞二三啓運乘飛躍典謨訓誥  
雅頌作黍離以降周室削天將尼父為木鐸乃芟詩  
書定禮樂乃作春秋明善惡爬羅萬象歸一勺放彌  
六合卷諸橐七十二子相唯諾才出中州氣渾朴及  
漢史記變矩矱西京雄健東差弱建安馬上詩橫槩  
其音稍振氣已駭晉更六代轉銷鑠唐包九有復充

斥至宋諸子雄相捕廬陵崛起超卓躒道州獨立承  
絕學後出新安最宏博有元將相皆沙幕往往南土  
登館閣從此斗牛氣磅礴乃挺奇才海東角蚤年脫  
穎何落魄貫穿經史探韜畧出入佛老搜冥漠鯨跳  
鰲拚鬪蛟鱷不持寸鐵徒手縛大弨射日孰能曠長  
劍倚天誰敢斫是乃浩然之氣擴簸弄元化筆在握  
星辰迸空如石落剛風立海大雨雹湧湍壘躍濤怒  
搏百恠倏忽光揮霍矯若魚龍舞澆滸蔚若虎豹跳  
崖峩飄若孤飛駕黃鶴勁若百鷲出玄鶚鉤鏗大音  
振咸護赤奕雄芒射干鎮迫而察之吁可愕注如懸



河思不涸大田五穀當秋穫武庫衆寶開晨鑰左右  
而取非外攫遂造平坦鏗磽确淙淙安流宗大壑上  
尊玄酒殊澹泊東序天球匪雕琢自然光燄發葩萼  
我時訪君即命酌春風蒲萄釀酥酪雪夜糴稊擁鼯  
鼯招月與友相酬酢月入尊中明可捉漱嚙醲郁棄  
糟粕此時豪縱脫矰繳吐奇挾恠安可約有烏如火  
天井絡掃除旬始銷格澤金篦刮目割翳膜郢斤斲  
鼻揮漫垂妙處神會不可度而我旁觀駭且忤如遇  
仙人授金藥一食生羽脫塵殼願為弟子請奇着先  
生忘言只大噓余亦歛衽逡巡却如此筆力扛鼎鑊

不遇明主將焉泊聘以束帛加雙玉幅巾大布起林  
薄奏賦上林從楊杵豈比執戟其寂寞天王手按龍  
泉鏐大振天聲重開拓勢若新篁解春籜用爾作樂  
為簫籥銘功頌德軒寥廓日光月潔江漢濯前驅班  
馬鞭六駮後駕歐蘇駮兩駱千載而下宛如昨碌碌  
餘子徒齷齪傑哉先生果何若微子之裔散人託景  
濂其字大夫爵我作狂歌非用譴投以木瓜報芍藥

唐仙方伎圖

王佐

開元天子承平日錦繡山河壯京室金殿璇題表集  
賢玉屏粉繪圖無逸夔龍接武居阿衡萬方旭日當



文明衡山老仙何所有亦復通籍承恩榮縞衣白髮  
醜顏老白說時來致身早綵篋初開玉仗分白驪突  
出銀鞍小榻前製號賜通玄始信人間別有天樓船  
未遣蕊珠賜歲籥俄驚天寶年九齡歸卧曲江上牛  
郎又入中書相花雨香飄蘭若鍾柳雲春撲金鷄帳  
萬幾日少樂事多梨園法曲聲相和鬪鷄舞馬看不  
足不獨仙人呈白驪仙人豈是呈仙伎畫者傳之有  
深意延秋門外羽書飛却駕青驪向西避青驪劍閣  
雨淋鈴一段閑愁尚不勝不道畫圖今若此風簷鐵  
馬響昭陵

醉夢軒為錢公鉉賦

東吳錢高士索賦醉夢詩十年不是不題句我亦醉  
夢無醒時問君醉夢緣何事君言不解其中意但知  
痛飲復高眠即此悠悠是生計滄溟傾瀉供杯盃乾  
坤偃仰如遊廬神遊溟滓鈞天外心寓鴻荒太古初  
人皆掉舌談臧否君方默坐糟丘底人皆明目辨妍  
媸君獨曹騰黑糾裏君不見汨羅江邊人獨醒捐軀  
博得千載名又不見玉戎鑽李執牙籌晝夜營營筭  
不休人生適意此為樂何須苦覓揚州鶴竹葉杯中  
閱四時蘆花被底舒雙脚錢公錢公真我師平生此



意君得之連林未遂論文約潤筆先求買酒貲我生  
落魄惟貪飲百事無聞只酣寢生死真同力士鎗  
枯竹與邯鄲枕邯鄲枕上意如何笑殺當年春夢婆  
貪看北海清尊滿誰願南山白石謔吾聞醉夢之鄉  
一萬八千里中有仙人長不死李白佯狂樂自如陳  
搏鼻息呼難起行行又入無何有之鄉麒麟作脯瓊  
為漿借得仙人笙與鶴三清八極同翱翔

大魯生歌

錢宰

才莫學商與申謀莫學儀與秦聖人龍飛起霄漢君  
子豹變乘風雲正堪下士養純素坐看四海風俗淳

君不見韓非作說難西游入函關孤憤五蠹信奇險  
身亦不能免於患君不見酈生事豪傑東遊下齊城  
銜盃馮軾騁雄畧終以賣已遭其烹所以大魯生游  
心極玄古大道真探造化先淳風不離元氣毋漢陰  
抱瓮真與倫惠施據梧堪作伍達人個儻笑爾愚智  
士縱橫嗟我魯豈知愚魯本天真渾沌鑿鑿真何補  
大魯生夫奚為孔門弟子三千七十二參也竟以魯  
得之

天遊方丈歌

子好遊乎吾語子遊子好遊乎吾語子遊魯連抗節



東海取個儻有策輕玉戾北遊邯鄲救全趙秦兵解  
圍不得留彎弓射書困燕士猛將吞聲甘斫頭咲揮  
千金賤封爵但令四海竒其謀馬遷有才生龍門逸  
氣磅礴橫乾坤南遊江淮恣竒覽江水萬里來峨岷  
會稽神書封禹穴金匱石室赤手捫周南留滯何足  
較青史萬古雄其文雄文錯落紛天章上與斗星爭  
光芒竒謀偉畧驚世人風霆變化森開張吁嗟竒士  
不復見龍門之下已黃土東海之水今成桑文亦不  
能騁其氣謀亦不能施其長功名事業竟何益壯遊  
之迹成荒唐不如學仙子一氣凌紫霞尸居在岩穴

夫遊邈無涯朝登泰山望滄海手板扶桑滄日華夕  
休華岳渺西極笑吁金精牽若花閨風瑤島何淺清  
崆峒具茨非杳冥倦遊歸向山中室方丈彷彿如蓬  
瀛廣成子安期生與爾逍遙大霞表一洗人間萬古  
情

望明風雅卷之九







